

救
偏
瑣
言

救偏瑣言卷之三

發熱論

痘瘡未形。熱兆其先。何以其自熱始也。蓋痘本一先天毒火。毒而係乎先天。毒自內出。可知而且濟之於火。其爲熱毒。又可知。熱毒發於內。而欲達於外。其有不熱者乎。然熱症繁多。何以別其爲痘之熱也。毒一萌動。出乎包孕之地。其勢旁達。細察其毛竅。則聳簇按其肌肉。則咽惕唇口必濡跳。手指微抽掣。有似驚意。但驚則顯見。而迫彼則隱微更緩耳。其所以然者。

以毒尋竅而出故也。其氣腥穢。冲冲而起。眼必昏沉。胃必嘔吐。氣濁而神不清。所以然者。以胃與目。神與氣。屬上焦。而主輕清。目更係五液水會之地。爲腥穢所干。自搖動而不得清寧矣。凡發熱而有是象者。痘之熱也。古人驗中指。獨自冷者。亦謂其中指通受納之關。胃爲穢毒所衝。而故失其常也。又卜其兩耳紅筋必輕。紫筋必重。與夫耳眦冷熱之辨。亦爲耳乃腎之竅。水受火之搏也。然有驗有不驗者。必合驗前象之爲最確耳。痘無所感。痘自募然而萌動者。其象

如斯。若先感寒邪。必鼻流清涕。面顏青慘。翁翁發熱。不免於浙浙惡寒。頭疼拘縮。而無汗。啞兒烏知其疼。驗其眉愁是也。若感風熱。則面赤聲重。涕唾稠粘。氣粗鼻塞。而氣熱。太陽筋惕。身有微汗。若傷飲食。胸腹按之必愁。彈之如鼓。口中噤腐酸臭。大便或閉。或瀉。閉則轉矢氣極臭。瀉則如注。穢臭倍常。驚則面有青氣。但不惡寒。手足兢跳而不拘縮。卒然啼哭而若有所見。神情恍惚。如人捕捉。緊抱則安。稍動卽悸。甚則或斜視。或上竄。手足拘攣。角弓反張。四者皆客。

感本非痘象。然皆足以致痘。痘若因感而動于中。必合痘象而見於外。症雖多般。總不離熱。是熱也。痘雖未形而痘之吉凶生死未始不判於當下。如客感無侵。則毒無阻礙。更得熱勢和緩。體膚滋潤。微兆其欲痘之象。別無可虞之症。將來放點。痘必氣領血載。稀疎綻突。榮潤可觀。吉之兆也。如痘本輕。客邪太重。重在表。則腠理閉密。而毒無出路。重在裡。則中宮填塞。而毒難宣暢。重在驚。則神情虛惕。而毒不得振作。縱令痘無可虞之象。而客邪有變痘之虞。是謂險從

順變而吉中不能無凶矣。若夫壯熱煩渴或大便秘燥或小便赤或不耐衣被者不必問客邪犯與不犯熱象如是泣自匪輕難乎其爲吉矣。至於熱如火熾體膚更燥發渴不已口熱如爐鼻燥唇裂目紅頰赤小便癃而大便閉者此熱之盛而凶之至也。乃有徧體燔灼而四肢則冷體燥如炙而頭汗如蒸有靜則燥熱如炙動卽汗洩如油唇口焦裂舌起芒刺目紅而睜毛倒豎面赤而板硬如臃鼻衄成流溺血如膏置身體于泥水之中則快嘔米雪于咽喉之下

則爽有一於此。是熱盛之劇窮凶之至。而與死幾鄰者也。又有骨節煩疼。腰如被杖。徹夜無眠。身無安放。靜則昏瞶如迷。躁則如魚失水。筋抽脉惕。甚至手足俱揚。皮毛刺痛。甚至衣衾難動。有叫喊而不休。有欲啼號而莫得。目閉者。終日不開。直視者。終夜不合。舌弄如蛇。天柱倒側。此等惡症。熱如炮烙者有之。頭溫足冷者有之。唇焦頰赤者有之。青慘黧滯者有之。卽一體之中。寒熱相判者有之。陰陽殊絕者有之。殆不可以數紀也。所以然者。以毒火有隱見之分。非真

有寒熱之介也。廼若從前所論熱之有溫有壯壯而有潤有燥燥而有劇與不劇者何以故以毒火有輕重之別在氣在血之不同耳。火毒初萌有血當其先者血當其先則血之受毒倍於氣有氣當其先者氣當其先則氣之受毒倍於血毒所以有在氣在血之症也。血屬陰以陰遇火則自熱火毒得其輕則熱自透而能和氣屬陽以陽遇火則熱自壯火毒得其輕則熱雖壯而能潤令重者而血當之身之賴以滋養者惟血血爲烈火煎熬則血失其養其熱自爆而

體不得潤矣。令重者而氣當之。身之賴以運行者。惟氣氣爲壯。火所蝕。則氣失其運。而脉絡爲之阻塞。遏鬱處則冷。衝突處則熱似火。汗如蒸矣。重極者而血當之。以有限之血。而抵無涯之火。猶杯水而敵車薪。鼎沸於內。則妄行空竅。蓄聚於中。則聚結成瘀矣。血至於瘀。而氣有不受困乎。尚與其能領毒而發見也耶。不熱自有之矣。外見青紫如傷。藍斑如龍。是其驗也。重極者。而氣當之以陽剛之性。而攫烈毒之火。陽既亢而毒且腐。陽亢則熱極生寒。火極似水。毒厲則

萌動卽攻。未幾欲潰。經絡隊道。悉爲毒鋼。尚冀其能
蒸發而熾熱也乎。凡見悶亂無聲。面顏青黯。是其驗
也。所以悶痘之斃。不俟終日。總以無所容其發洩焉
耳。故熱雖發。始之症。而熱之輕重緩急。不可不知。輕
者不治而自愈。緩者從容而可圖。重若忽而必敗。急
若憐而何追。挽回調劑。古人必按痘之形色。而後
推敲施於緩者則可。其重且急者。痘雖未形。而兒體
之生命。已在涉春冰而蹈虎尾。乘痘未及見。毒雖猛
而尚未有定位。火雖烈而尚未及燎原。此誠轉危就

安之機。起死回生之會也。必俟察形驗色。其勢已成而牢不可破矣。况乎形從氣見。色以血呈。欲卜形色之美惡。卽氣血安危之機。而逆睹矣。欲察氣血之機。卽發熱時之景象。而昭然矣。誰謂發端非究竟乎。火未至而先烟。雨將至而雲合。由來其機如此。得此。佗關於發熱時之調劑。不必求合于痘。而自中的。若泛以熱治。未有不致悞于重而急者矣。

附治驗

朱吉人兄小公郎。甫及百日外。忽一夜身熱如焚。

躁亂不寧。次早舌卽有胎。乾燥如炙。口內如爐。頻
頻乾嘔。筋抽脉惕。腹硬如石。而有痘象。余固知其
惡痘將萌。烈毒沸湧。故發始便猖獗也。勢雖危篤。
幸痘尚未見。挽回惟冀此耳。卽以黃連三分。石膏
七分。大黃三分。佐以荆芥。葛根。地丁。赤芍。木通。丹
皮。蟬蛻。青皮。乘毒無定位時。連投二劑。勢不稍緩。
照前方加生地。錢許。又二劑而痘見矣。其細密如
針砂。色甚乾紅。絕無生理。仍以前方用大黃七分。
桑蟲一大枚。又二劑。解毒垢甚多。三朝如針砂者。

之悉行退去。稍成顆粒者。色轉紅活。筋脉尚惕。熱猶火熾。徹夜啼號。其餘減半。以一方貫至九朝。根紅頂白。肥潤可觀。十朝成漿。頓足。神亦稍安。熱亦減半。照前方減大黃石膏十分之四。十一朝熱勢復然。啼號如故。膿漿迅速乾焦。紅暈尚是。炊赤。前方倍加生地大黃石膏。外和猪尾膏。并大棗蟲以鬆透其餘。十二朝發斑如霞。晚卽安睡。焦痂鬆擡。色亦滋潤。至十四朝如前惡症。般般復作。牙齦腫腫。有細細二牙爲毒。擁出點乳。不能進。是時予在潯。

中。次見將針挑去。照前方調牛黃珠末分許。方得吮乳。諸症稍愈。十六朝予歸。徃視。腦後與環跳起一大癰。前方加貝母羌活。滅生地石膏乾葛。服至二十朝出膿收功。

又

仲文張兄。二公郎。癸未仲冬。忽身熱如火。神即昏。憤。舌刺如煤。唇口焦黑。身上如針刺血癍。不紀其數。溺血紅鮮。肉瞤筋惕。有若驚悸。固知其痘趨百竅。而然第此惡象。宛然一悶痘景色。斷非輕劑可

挽卽用石膏一两。大黃五錢。黃連三錢。生地一两。
佐以青皮。荆芥。地丁。丹皮。天寒稍配蜜炒麻黃三
分。姜一片以行之。大劑灌下。卽嘔。仲老曰。奈何。余
曰。毒火上衝。水火搏激。兩不相下。故爾。任其嘔逆。
彼上而我下之。藥一進。必受納矣。二劑便覺
稍差。漸而得進。直至第八劑。方全受納。如此大劑。
服過十餘劑。方始見痘。及其見痘。可以數紀。唇舌
猶然煤黑。溺血復然。至九朝後。焦唇始退。舌亦有
津。年已八歲。問之方答。神覺蘇醒。至十二朝後。尿

血得淡。胃氣日開。十六朝而全愈。服過大黃十餘兩。石膏生地約有二觔。得以成功。是早圖之一驗也。

又

竹溪沈公挹兄。一小愛年及週歲。一日身熱如焚。汗出如雨。兩目傍得。如畏刀鋸。卽用大黃四分。黃連三分。石膏二錢。餘佐以丹皮木通山查青皮蟬蛻。連進二服。次日神色定。放標數點。磊落分明。熱勢復然。又二劑熱和。神爽痘甚稀疎。色亦頗潤。遂

減苦寒蕩滌以中和之劑至八朝漿足回好

升發論

升者提清氣以上達也。發者開百竅以四播也。世俗但知以毒透毒不知升發之義者也。痘自包孕之地萌動而起達於肌肉見於皮毛。一皆從竅而出竅有阻塞則毒無出路矣。周於一身徧於四體一以頭面爲主清氣不升則元首蒙蔽矣。舍輕淺之痘不得沾沾以逐毒爲發也。故古人有以升麻葛根湯謂已發未發俱可用以葛根能開洩腠理疏暢百竅痘得以

縱步而出。升麻能提氣上升。透發頭面。痘得以擎領。提綱。其不專以毒逐毒可知。然成方又不可拘者。愚謂痘犯氣虛。膜裡不疏而自洩。必用乾葛。則重洩其表。裨氣愈虛。痘反餒而不振矣。痘犯血熱。毒火不提而上竄。必用升麻。則更提其餒。裨毒愈湧。致毒反攻頭面矣。又有謂一見紅點。便忌升麻。乾葛。愚謂氣虛則氣下陷。虛劇者升之而猶未能上達。法必得補而可克。并升麻且不敢用。痘將何由而起。血熱則表裏壅遏。熱劇者疏之而還虞未濬。法必攻之而得暢。并

乾葛且不敢用。臬毒何自而鬆。此兩說者。各執一定見。而不通變學者。不可以概法也。況升發之妙。亦非僅以提爲升。以疏爲發。疏則第可以逐寒邪。散風熱。提則第可以助清陽。發真氣。不惟真虛真寒。惡火惡毒。所不能調劑。卽如飲食停滯。暑溼穢氣。孰非阻竅。脉而碍氣道者。其得以兼攝否耶。存心於此道者。必審其何痘宜疏。當不虛其表。何痘宜升。當不提其毒。何痘宜升發。並行兩用。而兩得其効。何痘可以升發。無籍。卽得以無事爲工。何痘宜寬中。何痘宜清徹。何

痘以不發爲發。不以疏爲例。何痘以不升爲升。不以
提爲則。總令氣之得以直達。不爲毒餌。不爲火蝕。不
爲邪鬱。不爲穢閉。不使窒礙。不使消阻。得以拘領其
毒而出。升發之梗概。庶乎其得之矣。得此機關。苦寒
如芩連。辛熱如桂附。補塞如參芪。蕩滌如硝黃。何莫
非升發之劑。此竅不得。山甲人牙。施於燥熱之兒。地
龍尾血。投於寒凝之痘。桑蛀蟬蛻。隨痘皆宜。據日期
而不敢多用。魚蝦雞笋。鑽瘡宜禁。凡遇痘而漫無區
別。本透毒之利刃。與不能操刀者。而反割矣。若是則

佞之又佞。似乎無可適從。要不外於表裏虛實之間。輕重緩急之勢。驗其形色。考其症狀。體其神情。參其脉息。一而端詳之。治法與發熱之條。無兩軸也。

附治驗

先君治一痘憲副馮魯翁之孫。昌老之長公也。兩朝稠密無縫。皮薄色淡。身涼體靜。睡不令眼。神情困倦。而顏眊白。吐蛔數條而俱死。此虛寒而鄰於逆者也。先君卽以保元湯。加芎歸肉桂山甲數劑。而症僅中止。絕無起勢。仍以前方用參三錢。芪五

錢外加熟附五分。日服二劑。六朝痘漸起。色漸紅。囊漸蒼老。肢體亦煖。參至四錢。芪六錢。附七分。喜便不瀉。更加淮熟地膏半盞。鹿茸膏數匙。至十朝而漿得肥濃。精神漸朗。寢食俱安。十四朝回結收功。因茄乾燥。防其餘毒。以參歸化毒湯。重以忍冬膏調理而安。

又

孝廉嚴蔚翁。一公郎六歲丙戌仲夏。見痘。花紅色。滯頂陷不鬆。身熱如烙。煩躁不寧。按其胸膈。愁痛。

口有噤腐氣。累日不起。此毒火伏於內而中宮有
停滯也。以大黃二錢。青皮錢許。煎之。蟬蛇荆芥赤
芍紅花地下。外用山查一兩煎汁碗半以代水。連
投二劑。解宿糞甚多。痘卽頓起。痘色嫩赤。仍用前
方加黃連生地。漸漸放白。成漿。第壯熱未和。虛燄
尚在。前方貫至十二朝而始收回脫靨。得以成功。

又

孺山一故友鍾晉叔兄。有一小愛痘。值炎天受暑。
煩擾非常。壯熱如焚。痘色乾紅。累日不起。渴甚。井

水不敢多與。僅一碗。便覺爽朗。求之不止。不覺
飲及一斗。通身微汗。而神情始快。痘卽隨起。色亦
紅活。終以清火解毒收功。

又

韓太史一孫。子遽兄之公郎也。甫及週歲。忽一日
身熱如烙。昏迷不醒。似驚非驚。而有痘象。余固知
其必痘。却屬火裡苗之症。非輕緩之劑。所能取勝
者。以大黃錢許。石膏黃連。佐以清透達表之味。連
投二服。而痘遂見。勢亦減半。至三朝。痘頗稀朗。自

起發以至結痂。無甚風波而愈。向非早爲之計而釀成之。殆有不可知之局矣。

疏表

發痘機關先辨表。表係痘瘡之門戶。表若無邪。莫過求表。若干邪無出路。疏表必等是何邪。不可混同無區別。冒寒清涕在隆冬。蜜炒麻黃蘇與芩。傷風涕唾必稠粘。羌活荆防可去風。風熱相兼身燥熱。面赤辟驛口膩渴。前胡荆芥葛根宜。莫用辛香與燥溼。表症雖無痘不鬆。亦宜三味無他擇。痘如起發表邪清。不

可過用令肌洩。若還表虛痘必痒。表若留邪毒閉塞。亦有表清毒已透。痘出炊紅或紫色。此是血熱火熬。煎血中之火當俾徹。荆芥一穗妙靈丹。徹始徹終莫計日。

附治驗

一故友朱漢卿小公郎。痘稠密乾紅。一友以痘色乾滯。便以清火而兼升發。累日不起。予見鼻流清涕。體涼而且靜。時在春初。寒風凜凜。此熱毒輕而感寒重。毒火爲外邪所閉也。以溫肌透毒散。陳皮

換荆芥連投二劑。身體卽煖。痘卽頓起。次日鼻塞
眼封。而痘發煌。身漸熱。痘日肥。清解治毒。調理收
功。

又

韓聖翁。五公郎痘。歲在己丑。稠密不鬆。眉愁腹痛。
終夜不寐。其毒盛可知。蒼白乾滯。涕唾稠粘。頭溫
足冷。其毒爲風邪阻塞可知。急疏風以開其牖。佐
於攻毒以達其滯。至四朝。體漸熱。痘漸起。色漸紅
活。但眉宇不開。筋脉時惕。以活血驅毒。貫漿結。痂

而回。

又

一兒痘在三朝。目紅鼻塞。時或噴涕。而涕甚濃。氣粗壯熱。痘甚稀。却色滯乾紅。無甚內症。呆呆不起。以大劑荆芥穗葛根前胡佐以黃芩牛旁木通丹皮蟬蛻青皮赤芍三劑後。而起勢沛然。六朝肥紅綻突。不假餘力而順叙收回。

達裡

發痘機關當究裡。痘有未見先傷食。飲食內停中氣

阻轉運失職脾困苦。縱然痘順亦淹遲。設一痘險尤難布。要識如何爲內傷。口中噯腐氣非常。恒有吐瀉交相迫。亦有胸膈難按掌。有轉矢氣甚酸臭。指彈腹聲如悶鼓。此等內傷悉非輕。萊菔陳皮枳實。蒼皮等味佐桔梗。欲其下降必兼升。有升有降理自然。前胡下氣必推陳。木香厚朴姜砂類。氣味辛香與燥溫。症非燥渴方擬用。不可混作消食論。食若無多僅帶山查麥蘖亦足應。輕重寒熱最宜分。若還倒置痘

光困

附治驗

予三兄辛酉生兩歲出痘時在孟夏壯熱昏迷痘色乾紅顆粒稠密然得分珠亦不脚塌自放點以至三朝絕無起勢惟氣粗頭悶轉矢氣極臭細審未痘前曾食何物却食一苧頭圓子重以枳實山查桔梗前胡廣皮麥芽佐以赤芍蟬蛻牛旁鮮結糞甚多而痘卽立起且色亦紅潤嗣後以痘甚密功力雖難而破竹之勢殆由此也

又

孝廉施禹翁。一季弟。幼時出痘。道中始事之友。極其升發。四朝毫無起勢。狂煩叫喊。至於咽啞。目時上竄。始事者告辭去矣。予至。舉家號泣。以爲必無生理。禹翁昆弟。篤於孝友。懇予甚切。予視痘雖不起。而根窠尚在。第稠密蟠紅。頂陷乾滯。身體反涼。予按其胸膈。手足皆起。診其右手寸關洪滑而實。予知其內傷太重。而致痘閉塞也。遂以枳實五錢。青皮前胡各三錢。桔梗五分。佐以荆芥蟬蛻。用山查二兩煎湯代水。是夜連進兩頭汁。次日午候又

一進一劑。下午一餐。宿垢極多。痘前縱食雞肉。完而未變。將晚又解一次。仍前極多。痘卽頓然起發。神卽安靜。身體大熱。但痘色依然未轉。前因中宮停滯。故毒火內伏而不熱。今得通達。則火毒發見於外矣。神故得以安靜。嗣後以至結痂。終以涼血清解。痘漸紅活。漿漸肥濃。痂亦不薄。收功而愈。聊舉一二。以驗內傷阻痘者。

痘有首尾疏達訣

此疏達者。蓋言毒火有表裡俱盛。令首尾得以宣暢。不使壅遏。非指外感內傷也。

痘有首尾宜疏達不可專以痘初發初發之時固多
宜漿期斂候尤當察若使表裏俱實甚期在行漿正
湧盛疏表達裏不能權變症百出趨愈遠安望成漿
毒化膿壅遏毒火成內攻漿期已得此中竅期在收
痧又當曉謾道回漿宜斂陰宜疏反斂終不清致毒
留連難跳脫紅暈依然痧燥黑輕則纏擾重則斃多
因誤斂少清微謾道漿後症無實猶宜鬆達反令寒
毒痧抓肉不能落餘毒般般無休歇輕發癰疔重必
悶誤將惡毒爲虛論首尾疏達痘如何惡毒爲殃何

用多片雲能令清光晦前後工夫湏合符有一不侔
知未靖餘氛未殄得非茶症一炮熱尚如曩餘象和
平那算康痛苦神情仍未釋痘雖許可恐無傷漿信
肥濃形足羨色猶嫩赤可云祥形色神情俱似可一
惡當頭未肯降一惡深藏根未拔能虧九仞至淪亡
只此類推餘可概可拘末路不通方更有一痘最爲
奇痘出稀疎綻且肥起脹成漿猶似順順中倏爾變
崎蹊逆嫌一點非虛話結局雄疔要害踞有痘稠密
頗多虞前局多虞後轉移從此遽看渾似順順中恒

有伏干戈前途棄甲從旁刺。結局疔瘍徧體羅。早覺
尚能謀治策。脉卽攻心殞刻期。惡毒難靖猶難測。疏
達工夫可忽微。

附治驗

清溪章繼美。凡幾三旬矣。戊寅季冬。在外家王復
之處。忽然腰痛如杖。昏慣如迷。烈熱如炙。叩之不
答。身體振振。肉瞶筋惕。痘之象也。但腰如被杖。其
痘必逆。猶幸其岳復老。信余甚專。余得卽用大黃
山查各六錢。青皮羌活桃仁各二錢。佐以荆芥乾

葛佐參。乘痘未見。萌芽甫動。而預爲之地。庶望轉
機于萬一。令一見痘。腎已受攻。無及矣。自申至卯。
連服二頭汁。次早發出如芥如砂。色更焦紫。白頤
自足。并無容針之地。形色並逆。神情又惡。希冀何
在。予辭弗藥。主人哀懇甚切。情不容卻。遂用大黃
八錢。石膏一兩。黃連二錢。生地兩半。佐以荆芥。羌
活。葛根。牛旁紅。花。桃仁。蟬蛻等劑。加白頤地龍。每
劑十條。又以猪尾膏半盞。和於藥內。連服二劑。次
日其如芥如砂。并焦紫色。卽退顆粒。分明紅活。可

觀竟若改換。但無空隙之地。神情猶然昏憤。身體
仍炙如炮。生機却在手矣。翁婿原是甥舅。尊與堂
與其兄公瑾皆至。且驚且駭。且信且疑。復老力主
其事。云如是之痘。非如是治法。萬無生理。余亦爲
熱腸身任。前方不減不增。服至九朝。圓綻如珠。漿
黃如蠟。神情與熱法終復如故。大便日去六七次
而不暢快。自發始以來。水米不沾。內遣老姬問曰
不食可無恙乎。余曰。安穀則昌。絕穀則亡。寧得無
恙。弟是痘不食。非以寒涼太過。非以蕩滌傷胃。而

然胃果受傷氣血乏本氣血果虛漿從何自此痘
一本逆所賴治於未發臟腑不至潰敗氣血得以融
通故得以成漿如此然藥力僅可以搜刮隱伏之
毒未能驅除燔炙之火上焦清氣何能便徹只恐
梟惡之毒終非藥力能淨爲畏耳次日十朝正面
有回意絕不思食日期漸迫用大黃石膏各一兩
生地兩半黃連山查四錢佐以荊芥牛旁甘草十
二朝胃氣忽開神情纔爽熱勢亦和回結頗佳時
一值獻節渴想年糕因而無物不思次日便飯便食

肉十五朝回到。諸症悉愈。痂落如松皮。後又滿口
生疳。齒牙幾落。又服牛黃珠末。并黃連解毒湯十
餘劑而漸愈。月外復發一身血瘋瘡。身無餘膚。將
百日始得霍然。是痘疏表達裏驅毒導瘀涼血清
火自巔至末。不撤一劑而得收功。當危疑時。議論
紛紛。有云平昔斷喪腎虛而故腰痛者。有云稟氣
素薄而故神情昏倦者。有云從來肥甘不能入口
而胃弱者。有云如此稠密氣血有限。何能當此蕩
滌者。有云痘瘡何曾有此治法。深以爲怪誕者。非

復翁明時局。專信任。亦何能奏効。

又

一銓部錢孺翁。老先生一愛。平時內熱。瘦骨如柴。乙未仲夏。出痘。熱如炮熾。腹痛異常。身軀不能轉側。口穢噴人。紫滯稠密。但不細碎。惟幸初朝。毒火雖惡。尚未有定位。以大黃四錢。石膏七錢。生地六錢。黃連一錢。佐以青皮。山查。荆芥。葛根。赤芍。桃仁。地丁。紅花。地龍。臨服和猪尾膏。蓋許。以一方服。及六朝。色漸肥。紅放白。腹痛稍緩。餘俱未減。仍用前方。至

九朝漿甚克足。腹痛與熾熱較前尤甚。眼雖封而
眼角流血。譫語不寐。飲食不思。前方增犀角倍加。
★大黃生地石膏。減猪尾血。臨服以化毒丹調入牛
黃一分。珠末二分。至十二朝。頭面發臭。方能進粥
碗許。一日三次。腹痛與熾熱依然。至十八朝而始
跳脫。疏表達裏涼血導瘀清火驅毒。自始以至終。
一方成之。是首尾疏達。又一驗也。如此治驗。難以
數紀。聊附一二。以證其大畧耳。

痘有不宜疏達訣

痘有始終忌疏達不第行漿收靨時症犯氣虛難振
作發始須當預護持痘賴氣領方能透虛更疏今有
何寶毛竅況以氣爲衛衛已疏洩何堪再縱有客感
謂傷氣非若表實傷風例疏邪還宜兼實表竟爾疏
邪焉得起氣能克塞令毒暢氣虛裏實猶希旺藉令
通達混同施裏若虧今損何地卽有停滯謂傷脾非
若脾強傷食例消食毋使脾受虧脾氣虛虧痘必危
莫謂放標功有待始之不謹終何賴

附治驗

無奇姚兄。幼時於壬戌之秋。忽一夜吐瀉三十餘次。口不能合。兩目失神。絕不身熱。痘出。驀然。若不知何自而致。痘甚細密。而且一齊湧出。僅得分珠。却無空隙之地。顆粒固滿。却似水珠。有頂無盤。乃劇虛劇寒之症。與遁相去幾希矣。症象圖危。所希異者。氣血尚未離散。及早圖之。或可挽回。疏表達裏之劑。一不相及。初朝卽用保元湯。加白朮木香。當歸熟地。訶子如是之劑。服至六朝。僅得中守而已。倍加參芪。外用鹿茸肉桂。至八九朝。身得溫煖。

窠囊覺厚。漿水及半。但不蒼老。前方減鹿茸肉桂。
訶子。加白芍茯苓金銀花。神日開爽。乳食大進。而
回。痲終軟薄。可見虛劇之症。首尾溫補。尚不滿其
分量。其可循規則而疏達也乎。第今無是症矣。

救偏瑣言卷之四

放點症治準

痘未見點。豫卜其爲吉爲凶。惟於神情症象而求之。
脈理而參之。然非極美極惡者。未易鏡其將來也。放
點則有形可察。有色可詳。順逆險三途。昭然而覩矣。
蓋形成於氣。色根乎血。氣正則拘領其毒。毒有所拘。
痘雖密。而得定其位。不糊模。不細碎。顆粒分明。而脚
必周淨。毒有所領。毒易達于外。痘雖密。頂綻矢而囊
老。老。此氣得其正。而形其無間也。血正則榮載其毒。

毒有所載痘雖密而能安其位根有盤助囊厚其藏而饒涵泳毒受其榮痘不燥濇形雖密淡而不自紅而不嬌此血得其正而色其無咎也反此則氣血反受毒制可知有表裡俱虛而出不快者有表裡俱實而毒壅滯者有氣血虛餒皮薄而色白者有毒火熾盛形惡而色惡者千形萬態總由此出詳別證治於後。

放點於熱三日後身涼神爽顆粒鬆朗淡紅蒼老其餘可知爲順不必服藥。

放點熱不一。日烈熱乾炮帶火而出。不論稀密色一
紫艷。或焮紅。其他可知。此梟毒烈火及早固之。不
致日後內潰。急以攻毒清火帶清肌透發。不可以
初見而翫忽也。

放點有身不見熱。神情困倦。偶因四旁痘氣相感而
出。見痘色淡皮薄。此膜裡不密。肌肉不固。不能約
束。而然也不宜疏散。防日後有痒癩之患。以調中
湯主之。

放點有先因吐瀉困倦。頭溫足冷。適感時行而出。色

淡囊薄而淹滯不起者此氣虛不振不能透發宜以升發中卽兼治本免日後有倒陷之患

放點有熱如火熾紫艷焮紅神情躁亂累日不鬆而不起者急宜攻毒涼血清火疏肌以透之

放點有佳數粒色不甚紅亦有甚白身體溫和神情清爽不諸者目之爲順不知其囊窠累日不見粗壯痘色不見光肥浮沈其間名爲等件痘先見數點者報痘也四五日後身必忽然大熱神卽昏憒大隊鼻毒一時湧出其痘稠密紫黯大都不起明

者卽與桃破吮鬆其毒以藥胭脂貼之內服
膏通天散活血疏透來勢猖狂法必蕩滌庶可救
放點有毒火雄烈氣血不能約束一齊湧出火熱如
焚急宜攻毒涼血清火。

放點熱猶火灼乾燥如烟神情躁亂不論稽稠急宜
攻毒涼血清肌散火緩則毒卽內攻無及矣。

放點痘色乾滯黯紅身宜壯熱而反涼者以毒火遏
鬱于內非真涼也急宜散火疏肌活血透發俟火
透而後清涼不宜遽與清火。

放點痘其稀疏却間蚤癍或間紫般有若紫背浮萍。
或犯貫珠堆簇神情愁悶及諸黯痛楚之類多因
惡毒盤據于內表裡故不相符不可因其稀而致
忽也。卽當攻其伏毒鬆肌活血。

放點有唇烈掀腫甚有焦黑如煤或口中穢氣不堪
或舌起芒刺此毒火犯胃急宜重以清火涼血解
毒重必攻之。

放點皮毛刺痛衣衾苦動此毒壅于肺急宜重以攻
毒鬆肌透發失治至行漿時膿根不起必至燥痒

而斃

放點筋抽脉惕叫喊不已者此伏毒在肝宜疏肝毒
重必宜攻有咬牙者亦如之。

放點譫語狂煩如見鬼祟此毒火迷心宜涼血清火
兼之身熱如烙或諸般痛楚者尤宜攻毒。

放點骨節煩疼更有腰如被杖此毒在于腎大都不
起攻毒刻不容緩。

放點睛毛倒豎目胞下有血絲如線絆於其處或腹
痛不已身熱如火股冷如冰此毒伏于脾急宜攻

毒兼清肌透發。

放點小水有如醢魚汁。有鮮血如紅花膏。此毒火下注小腸。急宜攻毒涼血。鼻衄成流者亦然。

放點大便欲解不解。或解時疾首蹙額。所解如漆如膠。有若瘀血。有若羊糞者。此毒注大腸。急宜攻毒。因勢而利導之。

放點大便暴注如傾。有純解清水而躁亂者。此火擾大腸。宜分理涼大腸。五臟伏火伏毒。惟下利稍輕。以大腸爲傳送之地。雖壅滯艱塞。終得因勢利導。

放點顆粒稀疎。囊窠飽滿。而色有碧紅。有些紫艷。有晦色。此毒火在於血分也。宜鮮血分之毒。清血中之火。

放點有歸附甚厚。而囊窠不鬆。或平或陷。此血至而氣不至也。宜寬氣道。鬆肌疏透。兼他症凶暴者必下之。

放點有郭殼圓滿。而盤助乾滯。此氣至而血不至也。宜清滌活血。兼他症猖狂者必攻之。

放點有外感未愈。或風或寒。或風熱。或輕或重。有累

日不起。有起而不快。此爲表實。審其何邪而疏解之。令毒有出路。

放點有飲食未消。中宮阻塞。口中噉腐酸臭。腹內飽悶。痘出不快者。是爲裡實。急宜消化。令得宣暢放點。證治之大畧也。由此而推之。其餘可概矣。

稀有內症

痘欲其稀。稀則毒輕。不知稀而有內症。非真稀也。透於外。其毒則爲痘。藏於中。其毒則見症。或躁亂。或痛楚。或乾嘔。或昏迷。或失血。或叫喊。或洞瀉。或艱塞。或

痘畏其密。密則毒盛。不知密得克肥。其毒雖盛。而氣血頗饒。氣血雖饒。而或陷害於毒。亦何能透發于外。而觀其克肥。今克肥則氣血不爲毒害可知。克肥則氣血又得以制其毒。而化毒又可知。其毒雖盛。何畏焉。外有熱熾如火。或絳紅或紫艷。或煩躁。痘雖克肥。毒亦猛烈。較之深藏隱伏者。被得發見于外耳。又不待概以克肥而目之也。

總

毒無壅滯。痘克肥

痘得克肥。正有餘

訣

更得淡紅滋潤色

縱然稠密。莫躊躇

附治驗

雉城臧專老銓部明遠公之子也。幼時出痘于壬戌甚密而得克肥。公以稠密憂虞。余曰痘雖密。巢粒綻突。色不乾滯。慮不在此。所可虞者。近于紫艷。身體太熱耳。以清熱解毒湯。日進二劑。五朝大解。一次餘無別症。未思飲食。次日而漿即老。紅暈歛。赤大便。又三日不解。恐其成火褐症。謂主翁曰。急宜潤其大便。使毒以利鬆爲妙。成一火褐。餘毒太重矣。前方重以生地滑石兩許。更加黃芩。藥未及

熱而燥。痒卽發。舉家徬徨。急服之。更餘解。黑糞極臭。極硬。卽爽快。熟睡。紅盤漸淡。漸收。飲食大進。以忍冬解毒湯調治而愈。

陷有毒滯

氣不能克。則頂陷。陷則虛無疑矣。然必皮薄色淡。方合虛局。若囊厚色蒼。氣之本體已具。未有氣虛而囊不薄。色不嫩者也。以氣爲壯火所蝕。壅遏不能上達。以故陷而不滿。不惟囊厚而且臃腫。不惟色老而且乾滯。尚有別症可參。與虛陷自是迥別。每見時師不

求倫理 卷四 九 惠莊堂
審其由。一見頂陷。便爲氣虛。亦不識根脚之如何爲。
敏。如何爲癰。如何爲根鬆。如何爲毒絆。因其頂陷。連
脚亦混言之曰。此痘脚癰頂陷。并血亦牽在其中。則
曰氣血兩虛。必須大補。貿貿焉。竟以參芪保元固本。
以實投實。致誤者。不可勝紀矣。悲夫。

總 痘瘡頂陷若茱萸 囊老乾紅豈是虛
訣 氣因毒滯無能峻 毒得鬆分氣自尊

附治驗

竹溪沈公漸兄。四公郎二歲時痘。熱不三日。放標

于足脛。歪斜闊大如螺。緊貼皮肉。週身細密無
空隙。次日蘆沙疊錢。間于通身。惡形不計其數。且
痘色與肉色一般。肌膚板實。無粒不陷。叫哭不已。
脉惕筋抽。是毒滯血鬱之痘也。與逆之相去間不
一寸矣。以必勝湯減桃仁生地加當歸。日進二劑。
不見起發。乳不及半。大便去五六次。大衆蟲目以
四枚。六朝稍起而未鬆。減蟬蛻葛根。倍增大黃。大
便日去十餘次。至入朝漸鬆。漸紅。身漸熱。成粒者
起綻成碗者鬆泛如毬。始成膿。乳食大進。未得安

睡時或叫哭咬牙。悉炤前方十四朝。堆結如穀。痂亦滋潤。以忍冬解毒湯。加當歸調治全愈。

又

驥村錢公劉兄。乃弟東白先生之幼子也。痘及七朝。行漿期矣。通身頂陷紫滯。其環跳處堆聚如燕窩。俱板實不鬆。眼與鼻若未痘者然。并其頭面俱板實。晝夜躁亂。殆無寧刻。時常乾嘔。筋脉抽惕。此毒伏于內。氣壅血滯故耳。始其事者。謝絕去矣。余以大黃四錢。紅花生地。蟬蛻牛旁地。丁荊芥。佻參。

青皮黃連外加白項地龍五條。服過三劑。大便秘去三四次。痘稍有起勢。服及十劑。大便秘。去十五六次。所解皆是黑垢。如膠漆。臭惡無倫。通身頭面。頓起脹。卽時眼封鼻塞。而漿其沛然矣。其環跳堆聚者。尚未鬆泛。仍以此方服。至次日十二朝大解。約去二十餘次。僅似清水。一老嫗驚惶而問曰。如此頻解。可無害乎。予荅曰。痘今成膿。前躁亂。今安靜。皆便中來也。可許收功乎。予曰。必得環跳穴處成漿結痂。飲食能進。便許無恙矣。至十四朝。醫上

漿行且飽滿。胃氣頓開。大便卽止。不假一分滋補。不假一分止塞。飲食日增。方以和鮮餘毒之劑而收功。

綻有囊薄

氣尊於中則綻。綻則氣似足。然綻而不蒼。是空擡虛殼也。綻何取焉。氣虛不能衛護。邪殼隨毒而起。雖若圓滿而實飄薄。其色淡白。雖紅亦嫩。軀必溫涼。人必懶倦。無論氣虛不實。其血亦自不足。不得目其磊落。而可喜也。其本質與嬌紅同體。薄似浮衣。症自迥別。

乘氣血未至離散及時早圖未始不可以轉移也不則必至痒癩而斃。

總

氣虛頂綻痘空囊

綻若囊空反不祥

訣

浮擡不實成何用

及早扶元免破傷

附治驗

雉城臧君陶兄。幼時出痘于庚申。甚稠密。甫及三朝。卽起綻如珠。囊窠飄薄。歸附不厚。不甚安靜。身體微熱。四朝卽用保元湯。加芩歸熟地。六朝漸漸肥紅。八朝囊漸蒼老。漿未及半。大便不實而漿停。

重劑參芪。加川芎。鹿茸。膏木。香白芷。獎得充足。後調理收功。

薄有浮衣

痘瘡皮薄。自是氣虛。蓋皮毛屬肺。肺主氣。痘之囊窠厚薄。頂綻頂陷。蒼老皺嫩。皆氣主之。未有皮薄而氣不虛者也。獨有浮衣。則不然。毒火猛烈。衝突皮膚。其苦皮隨其炮熾而起。如湯火泡燃之象。較之氣虛之薄。其薄更有甚焉者。孰知其本然囊窠尚伏而未起。毒火一清。本體自透。漸成蒼老。然果何以辨其爲浮。

衣也。其道一以貫之。氣虛之薄。其體自涼。其盤自淡。其神必倦。口不膩渴。大小便如常。諸凡火象。自爾不犯。是爲真薄。若盤暈。赤躁渴。神煩。身熱如焚。或小便沁紅。大便閉結。或傾腸直注。不必一一反是。有一二千值的。確烈火無逃者。餘卽有似虛似寒。間乎其間。正其熱劇。隱伏之故。非雙關兩屬之症也。若以氣虛治。助其烈火。閉其毛竅。不得發洩。其外浮衣。勢必破碎如乾豆皮。內囊肉色燥赤如剝兔。并空際之地。亦散漫游紅。煩躁擾亂。而莫可救藥矣。似是而非可

不明辯也乎。

總 皮薄身涼屬氣虛 皮毛火逼起浮衣

訣 窠囊毒湧同於薄 一得清肌卽轉移

附治驗

後林潘中山兄。幼時痘症屬此囊似天泡之薄。紅
暈。紫如霞。徹夜無眠。身熱如火。渠尊公宗老。在
江右任所。內與乳母。深以皮薄爲不足。徬徨無主。
予力辨其故而始信。卽用黃連犀角大劑。生地。佐
以荊芥。丹皮。蟬蛻。牛蒡。臨服調牛黃一分。自第二

朝服至六朝漸漸蒼老散漫遊紅亦漸歸附根盤
圓淨頂白根紅仍以前方服至九朝膿漿滿足前
方加金銀花仙參始終以涼血清火解毒收功而
脾脫痂之後尚多餘火一路清鮮霍然

又

予一鄉親年十七。勇力過人。忽一日身熱昏迷。週
時即瘧。一齊湧出。稠密無空地。形與色宛似水珠。
但根窠結卓。呼吸之氣甚雄。薄之非因虛也明矣。
平昔勇力無論矣。其所以然者。氣與血均爲毒閉。

兩不至之故也。以荆芥葛根赤芍紅花木通地丁
紫草重以青皮外以山查二兩煎湯代水日服三
劑。次日頓然蒼老。第四日卽頂白根紅。復用前方。
七朝漿足飽滿。其體原厚。緣爲毒過。種種故爾。一
開其牖。正氣勃然莫禦矣。兩痘浮衣則同。一爲火
炮氣蝕。故壯熱遊紅。一爲毒湧血鬱。故昏迷色白。
一涼血清火。一鬆毒活血。各究其致。遊紅者歛色。
白者紅。囊葉均厚矣。

平偏與不鬆辨

何爲不鬆。板實而不暢滿也。何爲平扁。餒乏而不充拓也。其形若似。其致不同。一屬於虛。一屬於實。然實亦有不同。一有可生。一有必斃。囊窠板實。氣爲毒滯。以故不能暢滿。若血猶喘附。受困惟在于氣。一治其毒。毒殺其勢。氣得以伸。其轉運血。因以佐其流通。氣運血隨。而痘自鬆。其可生者此耳。今氣血俱爲遏鬱。若囊固不鬆。根亦無暈。所謂痘色與肉色一般。此氣血俱不至之痘也。無可救藥。如身凉人靜。囊軟色淡。絕無乾燥壅滯之象。是謂平扁。由氣虛而不能峻頂。

也。早宜保元湯倍用黃芪而振氣。內力得旺而氣尊於中矣。虛實補瀉之界。不可以不明辨也。

總

毒滯囊窠謂不鬆 氣虛平扁莫能克

訣

不鬆形色無柔嫩 平扁何曾有板臃

附平扁治驗

烏程陳大尹。乙巳歲一公孫。痘稠密乾紅始任事者。有三人焉。先以升發。後以涼解。五朝頂平囊扁。七朝眼有開意。鼻將有息。三人辭陳侯而去。延先君以決生死。先君驗其頭溫足冷。非熱毒可知。而

改保費率

投二劑而痘卽起。脹如珠。再二劑而漿卽充。滿後以參。歸化毒湯收功而愈。是症不概見矣。

不鬆治驗

孝廉王遇老。一小公郎甫三歲。痘在五朝。通身稠密。全不起脹。人不狂躁。熱亦不甚。有似餒而不克。余按其皮肉則板。探其口內如脂。而多乾嘔。則知其毒壅于內外。故不能起。非氣虛不振之論也。以大黃爲君。佐以疏表活血之劑。至臨服時。復特疑而問曰。毒滯攻之固其宜矣。萬一精神亦從而蕩

焉奈何。余曰。妄投則然。對症不惟不損。正以藥精
神之地也。二劑服後。便有起勢。乾嘔減半。而身反
熱矣。是毒透達之象也。前方加黃連生地。服至十
二朝後。以忍冬解毒湯而愈。

又

春元馮孝老。一小愛三歲痘。甚密。八朝絕不起脹。
頂陷色滯。筋抽脉惕。日夜不寧。頻頻乾嘔。大便日
去二三次。宛似一內虛平扁之症。始事者謝絕去
矣。舉家哀號待斃。余視之。頂雖陷而板實。色雖不

榮而紫黯。未有內虛而形板實者也。而況紫黯其色乎。至于種種見症。皆毒火發洩無門之象。余以大黃青皮山查達其裡。荆芥牛旁衆蟲疏其表。紅花桃仁赤芍猪尾膏以導其瘀。黃連石膏生地以清火涼血。二劑稍有轉機。又二劑更用化毒丹調入牛黃珠末。以化毒清火。大便日去十餘次。多而且暢。穢垢殷殷。頂卽起。盤卽潤。漿亦迅速。餘症未能跳脫。首尾一方。至二十朝而始霍然收功。

氣拘與毒糾辨

上文平扁與不鬆指痘之窠囊而言此拘與絆指痘之根脚而言也。根主盤暈而屬血。血隨氣以爲通塞。氣得其令則毒受制於氣。氣能以蓄血定位。拘歛其根不使旁溢。盤暈能圓壯而紅潤。是氣交則圓必周。淨之謂也。是爲氣拘。若氣失其令。受制于毒。氣爲毒錮。窠囊固不得鬆而盤亦緊束如箍。按之結硬則根無盤暈矣。是痘神情大都躁亂而體則不熱者。此屬不治。所謂陽毒易治。陰毒難理。是症無治驗。

總

毒絆根窠似氣拘

氣拘盤蓄痘克肥

訣 絆其緊束根堅硬 并亦無盤淚必揮

嬌紅非血熱辨

紅者血之體也。血因火動而呈其色也。痘不遇火雖紅必淡。紅則爲火迫矣。故古人有言曰。紅屬血熱。良有以也。蓋指紅深者而言。非所云嬌也。嬌則氣固不足。連血亦虛。無幾之血爲無根之火。遊行於皮膚間。故雖紅而實嬌。口必不膩。熱必不壯。囊裏不能厚。日後必至敗于痒癩。其痘最惡。所以謂紅而嫩不若白而老嫩者。嬌之謂也。

總 痘令深紅是火炎 水紅樞子又

誤 血虛氣弱嬌似嫩 皮薄漿清痒必癢

附治驗

戊午一沈氏子。痘密而紅色嫩而薄。身不甚熱。察其神情內症。絕無隱伏深藏之毒。先以疏透。四朝而發。寒悉起。卽以參茸歸淮熟地甘草山查日進二劑。七朝漸蒼。次日漿行。十朝漿頗膩而不能老。寢食亦安。減血藥。加白朮山藥茯苓金銀花調治收功。自甲子以來。是症百無其一矣。

血鬱非氣虛辨

白屬氣虛。自古言之。何以旣白矣。而云非虛也。蓋血著于外。則紅。鬱于內。則白。血受毒鬱。則血不能灌輸于痘。而潛伏于內。所謂血不至之痘也。然其空隙之地。必有硃砂斑點。雜于其中。卽未必其然。或有數點紫滯乾紅。而露其朕兆者。卽痘無可憑。或神情躁亂。唇口焦裂。渴膩如脂。或衄血溺血。舌弄如蛇之類。色雖隱伏。端倪自見。若以氣虛治。接於丁香姜桂之屬。不惟頂而縮。體焦紫矣。

總 毒壅血鬱不流通 血鬱難呈載毒功

訣 白卽似虛機自露 細心參合掩何從

附治驗

孝廉王含叔。三歲一愛痘。方見點。卽便咬牙。周身
痘色俱白。宛似氣虛。探其口。膩如脂。背上有三四
點。紫黯乾紅者。微露其端。則知其闔牙者。肝腎之
毒火也。色白者。血爲毒鬱而然也。以活血散火疏
肌透發之劑。痘色漸紅。但紅而不潤。顆粒不鬆。頻
頻乾嘔。夜不成寐。三朝用黃連生地丹皮牛旁荆

芥木通紅花青皮蟬蛻山查臨服和豬尾膏半盞。日進二服。色頓礬紅而未活。唇口漸黑如煤。前方倍用黃連生地加滑石地丁。外以牛黃七厘并豬尾膏服至七朝。色方紅潤。頭面放白。乾嘔減半。大便日去四五次。十朝漿亦堪回。唇幾已脫。照前方至十二朝。唇復焦黑。如老而燥。仍復咬牙大便日解十餘次。絕不思食。前方大劑生地加石膏。日進二服。牛黃每服一分。珠末二分。豬尾膏亦如前。至十五朝。鉄嘴復退。終不思食。大便約去三十餘度。

痂落八九。四肢強直。仰卧如尸。十六朝。唇口又黑。咬牙比前更甚。大便無度。俱如膠漆。或如藥汁。點乳不進。以蓮肉紅棗扁豆煮濃汁。灌入其口。嚥下。而此汁卽出如漏。乳母以寒藥太過。脾氣損傷。如此皆有怨言。主人明理。謂此藥不投。何能起發。以至落痂。第痂已落。何復如此。卽余之故。予曰。痘貴乎終。以餘毒脫卸之難也。若餘毒內攻。事已去矣。餘毒得透。可無虞矣。其餘毒必結于大腸。而故暴利如傾。又結于肝。而故咬牙不已。不則何以唇口

猶如乾漆。三退而三結也。必得內毒成熟。有膿血
便出。方可保全。然得精神有三四日可支。內毒一
二日可熟。便妙。是日十八朝矣。以牛黃七分。珠末
一錢四分。爲兩服。蜜汁調下。傍晚解紫血甚多。逾
時夾膿夾血。倍于初次。卽睡去。至夜便尋乳食。咬
牙頓止。唇口鬆退。神卽蘇爽。至天明解一硬黑糞
如石。大便五日不解。乳食大進。收功而愈。